

Entrevista di DIARIO cu musico local Igor Hasham

Musiconan feliz cu flexibilizacion di medidanan y awor tur hende ban balia



ORANJESTAD (AAN): Desde cu algun dia pasa, Gobierno di Aruba a practicamente elimina tur medida y a flexibiliza tur Decreto Ministerial cu tabatin pa yuda mitiga e brote di Coronavirus, por a nota cu hopi grupo den comunidad a hala un rosea profundo. Enberdad, e pandemia fuerte cu a azota mundo na Maart 2020 tabata un golpi duro contra tur esnan cu ta involvi den e industria di entretenimento, y a casi paraliza musica en general.

E siman cu musica a stop: E pandemia no a djis cancela un monton di concierto, tours, festival, y competencia rond mundo, sino a pone algun musico hasta biba pa algun luna sin entrada cu nan ta costumbra di dje, incluyendo Aruba. Tocamento den fin di siman na Hotelnan, na Restaurant, y varios Cocktail Lounge a finaliza den un frega di wowo. Varios fiesta di bruid programa di antemano no a sigui mas, y tur esaki a pone cu musiconan no tabatin lugar mes pa toca.

Rond mundo, e industria multibiyonario di musica a bay den un pausa indefini y a trece efectonan cataclysmico riba e resto di negoshinan

di entretenimento. E crisis aki a crea hopi reaccion di musiconan, cu tabata opina cu esnan cu ta maneha e reglanan pa publico no tabata preocupa mes cu e situacion di esnan den e industria.

Diripiente ora cu e casonan activo a cuminsa baha, a habri e porta un tiki y tabata permiti 1 of 2 musico toca na empresanan local, pero djis como 'background music', y nada cu ta stimula e bishitantenan pa lanta para y bay balia.

Hopi duro pa musiconan: "Pa bisabo e berdad, e tabata hopi duro pa e musiconan," ta loke e conocido musico local Igor Hasham a indica na DIARIO. Ainda e ta corda riba e siman cu musica a stop! Na comienzo di Maart 2020 ora cu tur hende tabata preparando pa e Festivalnan cu tin rond di celebracion di Dia di Himno y Bandera na Aruba.

Musiconan a cuminsa observa e storia con casonan di Coronavirus nobo aki a cuminsa plama na Europa. Tambe a keda spanta riba un Diadomingo, ora cu a tende cu ta bay tuma medida contra un vuelto cu ta yegando di Hulanda, y cu lo por tin hende contagia abordo.

Apenas despues, e siman a yega cu musica a stop na

Aruba! E prome casonan di Coronavirus a wordo detecta na Aruba, y e isla a shut down. Den un frega di wowo, miles di hende a keda sin entrada, sin sa ta cuanto esaki lo bay dura. Pasobra e ta un malesa completamente nobo, ningun hende no por sa e contesta ey tampoco.

Igor Hasham, kende ta conoci cerca su amigonan tambe como 'Tio Doc', a splica cu su grupo musical a bay den hibernacion total. Pero e mes a keda haci uso di e chens pa train riba su keyboard, riba su baho, y sigui skirbi letra pa cancion y perfecciona su musica. Training di banda a sigui? Igor a bisa cu durante Toque de Queda, tur esey a stop. Ora cu esey a flexibiliza, nan a cuminsa train bek, y concentra pa traha riba cancionnan nobo. Na December mes cu a pasa, nan banda a lanza 3 cancion nobo.

Pero no ta e musiconan so tabata keha! Publico di Aruba ta amante di gran fiesta, y stima un baliamento. Nan tambe tabata haya falta di dal dos riba pista di baile. Y esaki ta mensahenan cu musiconan local tabata ricibi tambe.

Ora cu a habri chens pa 3 musico maximo toca na

restaurant of negoshinan, tabatin grupo cu a logra "minimaliza" e banda y asina bay toca toch pa haya entrada. Aunke nan no tabata mag di stimula hende pa baila. Y asina a sigui cu e resto di 2020 y tambe 2021.

"Nos ta haya hendenan ta bisa nos, ta con hopi nan ta anhele pa subi pista y balia e dushi cancion di Sonora Matancera cu yama 'Florecilla de Amor', y tambe 'Respeta mi Dolor' pa nan goza," Tio Doc a indica. Pesey e tambe ta hopi contento cu recien a hopi flexibiliza tur medida, y baliamento por bek atrobe.

Riba e pregunta di DIARIO, si acaso ya caba Tio Doc ta cla pa cuminsa toca y deleita publico cu pieza y ambiente, el a haci y bisa cu nan ta cla pe e fin di siman aki caba. Segun Hasham, ora a haya sa di e flexibilizacion, cu mesora el a percura pa su grupo musical actua, esta e banda "Nos Cu Nos" ta cla pa cuminsa toca atrobe. E grupo ta conta cu cantantenan Lorenzo Flores y Quincy Hasham. Como trompetista y coro tin Hubert Leerst, y Keyboard y coro tin Igor Hasham mes.

DIARIO a nota cu e weekend aki mes tin hopi "happening" y a puntra Igor

que hubo di nan? El a bisa cu Diadomingo 6 di Maart mes nan lo ta na Young Fellow Bar riba Green Corridor na Barcadera. El a splica cu for di 6'or di atardi te cu 10'or di anochi, lo bay toca cancionnan manera Ultimo Romantico, Oye, Mi Kier Sali Cubo, Tembla, Negrura, Golpe Con Golpe, Conciencia, y Amada Amante. Den di dos set nan lo toca Paloma Blanca, Oiga Mire Vea, Daniel, 'Namorao, Tuma Tur, Muchachita Mia, P'alla Voy, Te He Prometido, Hello Merengue, Garza Blanca, Primintimi, y Amor Divino. El a bisa cu den di tercer set lo bay scucha loke pueblo ta pidi pe.

Pero que hubo di Florecilla de Amor? Igor Hasham a hari y a bisa cu cancionnan clasico manera e.o. Respeta Mi Dolor, y Florecilla de Amor ta wordo toca 100% tambe mey-mey di e cancionnan ey. El a bisa cu sigur hopi hende ta entusiasmo cu musica tey bek, baliamento a cuminsa atrobe, y awor ta tur hende riba nan mes tin di proteha nan mes di cualkier contagio. Pues si bo ta sinti cu ainda bo kier proteha bo mes, dal bay y balia cu bo tapaboca. Si bo kier of no, abo ta escoge pa proteha bo mes.